

# 《佛說大乘流轉諸有經》CBETA 電子版

版本記錄: 1.1

完成日期: 2002/11/04

發行單位: 中華電子佛典協會 (CBETA) cbeta@ccbs.ntu.edu.tw

資料底本: 大正新脩大正藏經 Vol. 14, No. 577

## No. 577 [Nos. 575, 576]

### 佛說大乘流轉諸有經

大唐三藏法師義淨奉 制譯

如是我聞。一時薄伽梵。在王舍城羯闍鐸迦池竹林園中。與大苾芻眾千二百五十人俱。并大菩薩摩訶薩。無量百千人天大眾。一心恭敬圍遶而住。爾時世尊為說自證微妙之法。所謂初中後善。文義巧妙。純一圓滿清淨鮮白梵行之相。爾時摩揭陀主影勝大王。往竹林中禮世尊足。右邊三匝在一面坐。時影勝王白佛言。世尊。云何有情先所造業。久已滅壞。臨命終時皆悉現前。又復諸法體悉空無。所造業報而不散失。唯願世尊。哀愍為我分別解說

爾時世尊。告影勝王曰。大王當知。譬如男子於眠夢中。見與人間端正美女。共為稠密。既睡覺已。憶彼夢中所見美女。大王於意云何。於眠夢中人間美女。是實有不。王言。非有。世尊告曰。大王於意云何。此之男子。於彼夢中所見美女。心生憶念戀慕不捨。可說此人是博識明智者不。王言。不爾。此是愚人非明智者。何以故。由彼夢中人間美女。畢竟體空。不可得故。豈能與彼而行稠密。令此男子情懷愛戀生憶念耶

佛言。大王。如是愚癡無識凡人。眼見色時心生熹樂。便起執著。起執著已隨生顧戀。生顧戀已情懷染愛。起染愛故隨貪瞋癡。發身語意造作諸業。然此諸業作已滅壞。此滅壞時曾不依止東方而住。亦不依止南西北方四維上下。至命終時意識將滅。所作之業皆悉現前。譬如男子從睡覺已。憶彼夢中所見美女影像皆現如是。大王。前識滅已後識生時。或生人中。或生天上。或墮傍生餓鬼地獄。大王。後識生時無間生起。彼同類心相續流轉。分明領受所感異熟。大王。曾無有法。能從此世轉至後世。然有死生業果可得。大王當知。前識滅時名之為死。後識支起號之為生。大王。前識滅時無有去處。後識支起無所從來。所以者何。本性空故。大王。前識前識性空。死死性空。業業性空。後識後識性空。生生性空。而彼業果曾不散失。大王。如是應知。一切有情皆由愚惑不知非有。妄起顧戀輪迴生死。爾時世尊欲重宣此義。說伽他曰

諸法唯假名	但依名字立
離於能詮語	所詮不可得
皆以別別名	詮彼種種法
於名法非有	是諸法自性
由名名性空	於名名不有

諸法名本無	妄以名詮名
諸法皆虛妄	但從分別生
此分別亦空	於空妄分別
我說諸世間	以眼見於色
皆由邪計想	是名為俗諦
我說一切法	皆是藉緣生
是名近勝義	智者當觀察
眼不見於色	意亦不知法
是名勝義諦	愚者不能知

爾時世尊說此法已。摩揭陀主影勝大王。深心頂受。時諸苾芻。及大菩薩人天等眾。皆大歡喜。信受奉行